



Giuvens passlunghists in visita a Schlarigna

■ (anr/fa) La prosma fin d'eivna han lö a Schlarigna ils Dis da passlung grischuns. Ün böt da l'arrandschamaint es da svagliar pro la generaziun giuvna la paschiun pel passlung. In sonda e dumengia sta Schlarigna suot l'insaina dal passlung: Ils Dis da passlung grischuns han lö ingon in stretta vicinanza dal cumün. Il club da skis Trais Fluors chi organischescha quists dis fa quint cun var 200 curriduras e curriduors. In sonda sun las cuorsas individualas illa tecnica classica ed in dumengia las stafettas illa tecnica libra. Il comitè d'organisaziun cul president *Beat Gruber* ha preparà l'arrandschamaint minuziusamaing: Ch'eir schi saja plütöst paca naiv in Engiadin'Ota as possan ils partecipants s'allegrar da pudair far las cuorsas süin loipas e pistas preparadas perfettamaing, pon els constatar. Aposta per quist arrandschamaint es gnüda preparada ad Islas in vicinanza dal cumün üna loipa attractiva.

In stretta vicinanza dal «Olympia Bob-run» San Murezzan-Schlarigna saran las cuorsas dals uffants e giuvenils da tuot il chantun illas ses categorias U8 fin U18/20. I'l territori Islas müdan passaschas planivas cun ascensiuns e descensiuns stipas ed ün pêr jadas müda la direcziun. I'l traget da cuorsa sun integrats eir ün pêr elemaints da cuorsas «cross». Il böt dals Dis da passlung grischuns es tenor graubündenSport da laschar giudair als uffants e giuvenils l'atmosfera da cuorsas e concurrenzas e svagliar uschea il plaschair pel sport da passlung. Las cuorsas individualas cumainzan in sonda, ils 6 favrer a las 14.00, e las stafettas in dumengia a las 10.00. In sonda saira saja pels atlets, trenaders e giasts in sala polivalenta da Schlarigna a partir da las 20.00 las rangaziuns imbellidas cun concurrenzas divertentas. La sairada vain drivida cun producziuns da musicists indigens.